

Uunga siunnersuut: Namminersorlutik Oqartussat kommunillu inissiaataannik attartortittakkanik inissiatut imaluunniit illutut nammineq pigisatut tiguisarneq pillugu Inatsisartut peqqussutaata allanngortinneqarneranik Inatsisartut inatsisaat nr. xx, xx. xxx 2017-imeersoq (Ilulissani, Aasianni, Sisimiuni, Nuummi aamma Qaqortumi Namminersorlutik Oqartussat ilaqutariinnut ataasiakkaanut illuutaannik aamma illuutaannik affarleriinnik ilaatitsinnginneq kiisalu tamakkiisumik akiliuteqarluni tiguisinnaanissamut periarfissaq)

(Kommuninut, Nunaqarfinnut, Isorliunerusunut, Attaveqaatigiinnermut Ineqarnermullu Naalakkersuisoq)

Saqqummiussineq

(Kommuninut, Nunaqarfinnut, Isorliunerusunut, Attaveqaatigiinnermut Ineqarnermullu Naalakkersuisoq)

Siullermeerneqarnera

Naalakkersuisut sinnerlugit matumuuna Namminersorlutik Oqartussat kommunillu inissiaataannik attartortittakkanik inissiatut imaluunniit illutut nammineq pigisatut tiguisarneq pillugu Inatsisartut peqqussutaata allanngortinneqarneranik Inatsisartut inatsisaat saqqummiuppara.

Inatsisartut 2016-imi ukiakkut ”*Inatsisartunut aalajangiiffigisassatut siunnersuutigineqarpoq Naalakkersuisut peqquneqassasut Inatsisartut peqqussutaata nr. 12, 19. November 2007-imeersup Namminersornerullutik Oqartussat kommunillu inissiaataannik attartortittakkanik inissiatut imaluunniit illutut nammineq pigisatut tiguisarneq pillugu, aalajangersakkat allanngortinneqassasut ilaqutariit ataatsit illui tuniniaanermi akigitinneqartut kisiisa atorlugit tiguneqarsinnaalersillugit*” pillugu akuersinerat siunnersuuteqarnermut tunngavigineqarpoq.

Siunnersuummi inuit amerlanerusut inissianik imminnut pilersornissaannik siunertaqarnerup allanngortinneqarnissaa siunertarineqanngilaq.

Ilaqutariinnut ataasiakkaanut illunik aamma illunik affarleriinnik tunisinermi, ilaqutariinnut ataasiakkaanut illunik illunillu affarleriinnik niueruteqarnermi akiusunik Nunap Karsiata kommunillu pissarsisarnissaat nalorninarunnaarsillugu erseqqissaasoqarnissaata qulakkeerneqarnissaa siunertarineqarpoq.

Siunnersuuteqarnermi illoqarfiit annerit tallimat ilaatitsinnginnissamut aalajangersakkamut ilaatinneqarnissaat siunnerfigineqarpoq. Attartortut suli illoqarfinni nunaqarfinnilu, allannguutissatut siunnersuummi matumani, ilaatitsinnginnermut ilaatinneqanngitsuni ilaqutariinnut ataasiakkaanut illunik illunillu affarleriinnik najukkaminik pisinissamut periarfissaqassapput.

Periarfissaq manna iluatsillugu Naalakkersuisut kontomut pingaarnermut 72.06.51 Inissianik tunisineq, oqaasertarliussaq nummer 2 inatsimmut attuumassuteqarfigisaanut ilanngunniarpaat, taamaalilluni inissiamik attartukkamik tamakkiisumik akiliuteqarluni pisinnaanissamut periarfissaq, kiisalu akilersuinissamik aqqqissuussinermik angusaqarsinnaanissamut periarfissaq ingerlaqqissallutik.

Taamatut oqaaseqarlunga matumuuna immikkoortoq Inatsisartuni suliassanngorlugu tunniuppara.